

بدرمه

بابا ء

همه دقیقه‌نی وطنک بر فلاکتنه آغلامقله کیچمش اولان حیاتک متقرب ختام  
ایکن سویله دیکک سوزلر ابدی خاطر نشاندیر .

(حکومت) نامی آلتنده اجرای رذالت ایدن بو هیئت منحوسه یی سن هپمزدن زیاده طانیوردک . مسلك سقیم اداره سنک ماهیتنی تشریح ایله نتایج مؤلمه سنی تعیین ایتدیکنک صرده کله جک زمانلرک کیچن وقتلردن خیرلی اولمایه جفنی آغلایه رق خبر ویرمشدک .  
اویله اولدی !

بو کون وطنده معصوم قانلریله مظلوم فغانلرندن باشقه بر شیء کورولوب ایشیدلمیور ؛ اوبیک شاعره منبع الهام اولان دکزلرینی شهدای حریتک الی الابد صوغومیه جق جنازه لریله طولدیردیله ؛ او کونلرکه وقتیلله هر بری بر طربکاه ذی صفا ایدی ، شمدی برر اینکده سکون پرورد .

هله تخریبات معنویه دها زیاده اولدی : ابنای وطندن برچوغنک وجدانی ، ناموسنی ، حمیتنی صاتون آلدیلر ، ساده دل معصوملره جاسوسلق اوکرتدیله ؛ وطندن صوکره یاشامغه علناً یمین ایتمش اولان فداکاران احراردن باشقه وظیفه سنه صادق کیمسه قالمدی . بو فجایعه قارشى حسسز ، حرکتسز طورمامش اولدیغمی تأمین ایله روحکه تسلیتبخش اولق ایسترم .

وطنک هر ولوله سقوطنه وجداتم بر فریاد ایله جواب ویردی . بو مجموعه او فردیالری برر منظومه شکلنده جامعدر . شو این وجدانی یی حریتک التجا ایتمش اولدیغ بو محشر رنگینندن قبر محترمکه اهدا ایدیورم . حیاتیله برابر حسیاتنک ده اولادینه انتقال ایتمش اولدیغی کوره ن بر پدر قدر متسلی اول بابا !

( 6 - 5 , s. 1906 , Mısır ، کیزلی فغانلر )

سلیمان نظیف ( ابراهیم جهدی )

## تماشای خزان

بو صولوق موسم کدورتدن  
داغیلیر بر اوداع بی کلمات ،  
پک خیالی ، رقیق بر «هیاهات !»

ضصف ایله دیز چوکن طبیعتدن  
یوکسلیر بر فجیع وضع دعا ،  
کیزلی بر شهقه ، بر سکوت رجا .

بو یله لب بسته ترک عمر ایتمک ،  
نظری بر لسان ایله آنجق  
ابدی افتراقی آکلاتمق .

کل بوکون ده ، سکوت ایله ، کوزلم  
احتضار خزان سیر ایدهلم :

ای بنم ، خزانلقا کوزلم ،  
بر دماغی و داد و رأفته  
قالهلم سربسر طبیعتله ؛

الم ارضه اشتراك ایدهلم ؛  
موسمک کائنات یأسنده  
اولهلم بزده بر غم زنده ...